

NOGOMETNI/FUDBALSKI SAVEZ BOSNE I HERCEGOVINE



**PRAVILNIK O ANTI-DOPINGU
NS/FS BIH**

Sarajevo, juni/lipanj 2017.

SAVJETODAVNO TJELO

Agencija za anti-doping kontrolu BiH

SADRŽAJ

Preambula

I. DJELOKRUG PRAVILNIKA O ANTI-DOPINGU I OBAVEZE

1. Djelokrug Pravilnika o anti-dopingu
2. Posebne obaveze igrača i tima
3. Nadležnost Agencije za anti-doping kontrolu BiH da vrši testiranja

II. DEFINICIJA I CILJEVI

4. Definicija i ciljevi

III. POVREDA ANTI-DOPING PRAVILA

5. Prisustvo zabranjene supstance
6. Korištenje zabranjene supstance ili zabranjenog metoda ili pokušaj korištenja
7. Odbijanje davanja uzorka ili nepodvrgavanje davanju uzorka
8. Kršenja vezana za neispunjavanje obaveze dostupnosti
9. Ometanje ili pokušaj ometanja bilo kojeg dijela doping kontrole
10. Posjedovanje zabranjenih supstanci i metoda
11. Prodaja, transport, slanje, isporuka ili distribucija bilo koje zabranjene supstance ili metode ili pokušaj takvog postupanja predstavlja kršenje antidoping pravila
12. Primjena ili pokušaj primjene bilo koje zabranjene supstance ili zabranjene metode
13. Saučesništvo
14. Zabranjeno udruživanje

IV. DOKAZ O DOPINGU

- 15. Teret dokazivanja i standard dokaza
- 16. Metode utvrđivanja činjenica i pretpostavki

V. LISTA ZABRANJENIH SUPSTANCI I IZUZEĆA ZA TERAPIJSKU UPOTREBU

- 17. Lista zabranjenih supstanci
- 18. Specificirane supstance
- 19. Izuzeća za terapijsku upotrebu

VI. TESTIRANJE

- 20. Opšta pravila testiranja
- 21. Plan rasporeda testiranja
- 22. Procedura testiranja

VII. ANALIZA UZORAKA

- 23. Korištenje akreditovanih laboratorija
- 24. Supstance koje su predmet detekcije
- 25. Istraživanje na uzorcima
- 26. Standardi za analizu uzoraka i izvještavanje, ponavljanje uzoraka, vlasništvo, smjernica

VIII. VOĐENJE REZULTATA

- 27. Postupak vođenja
- 28. Inicijalni pregled, analiza uzorka "B", revizija atipičnog nalaza pasosa i nepovoljnog nalaza pasosa, revizija propusta dostave informacija o kretanju
- 29. Obavješćavanje

- 30. Pregled povreda ostalih anti-doping pravila
- 31. Povlačenje iz sporta
- 32. Povratak u takmičenje igrača koji se povukao

IX. PRIVREMENA SUSPENZIJA

- 33. Nadležnost
- 34. Obavezna privremena suspenzija
- 35. Opciona privremena suspenzija
- 36. Dobrovoljno prihvatanje suspenzije
- 37. Obavještanje
- 38. Povlačenje suspenzije

X. PRAVEDNO SASLUŠANJE

- 39. Nadležnost
- 40. Pravo na pravedno saslušanje
- 41. Principi za vođenje pretresa
- 42. Razmatranja Disciplinske komisije NS/FS BiH
- 43. Postupak tokom takmičenja

XI. SANKCIJE

- 44. Sankcije
- 45. Početak perioda zabrane
- 46. Status tokom zabrane
- 47. Automatsko objavljivanje kazne
- 48. Testiranje prije vraćanja prava igranja

49. Poništenje rezultata u takmičenjima nakon uzimanja uzorka ili počinjenja prekršaja anti-doping pravila

50. Izricanje novčanih kazni

51. Vraćanje novčane nagrade ili druge vrste finansijske podrške

XII. POSLJEDICE ZA TIMOVE

52. Ciljano testiranje tima

53. Kazna za klub

XIII. ŽALBE

54. Odluke na koje se ulaže žalba

55. Interni pravni lijekovi

56. Žalbe na odluke donesene na državnom nivou

57. Žalbe na odluke donesene na međunarodnom nivou

IX. POVJERLJIVOST I IZVJEŠTAVANJE

58. Informacije o potencijalnim povredama anti-doping pravila

59. Javno otkrivanje

60. Informacije o boravištu i testiranju

61. Privatnost podataka

XV. ZASTARA

62. Zastara

XVI. PRIZNAVANJE

63. Uzajamno priznavanje

64. Priznavanje od strane klubova i članica NS/FS BiH

XVII. OPŠTA PRAVILA

65. Adresati

66. Forma

67. Tumačenje Pravilnika o anti-dopingu NS/FS BiH

68. Dodatni propisi

69. Predmet primjene: vrijeme

70. Pitanja koja nisu predviđena Pravilnikom

71. Stupanje na snagu

DODACI

A. Definicije

B. Lista zabranjenih supstanci

C. Izuzeća za terapijsku upotrebu

Na osnovu člana 35. Statuta Nogometnog/Fudbalskog saveza Bosne i Hercegovine, a u skladu sa FIFA Anti-doping Pravilnikom od 01.01.2015. godine i Svjetskim anti-doping kodeksom 2015. i Pravilnikom za borbu protiv dopinga u sportu u Bosni i Hercegovini, Izvršni odbor NS/FS BiH, na sjednici održanoj 01.07.2017. godine donosi slijedeći

PRAVILNIK O ANTI-DOPINGU NS/FS BIH

I. DJELOKRUG PRAVILNIKA O ANTI-DOPINGU I OBAVEZE

Djelokrug Pravilnika NS/FS BiH o anti-dopingu

Član 1.

1. Ovaj Pravilnik će važiti za NS/FS BiH, članice NS/FS BiH i njihove članice, te za igrače, klubove, sportsko pomoćno osoblje, službena lica utakmice, dužnosnike i ostale osobe koje učestvuju u aktivnostima, utakmicama ili takmičenjima u organizaciji NS/FS BiH ili njenih članica, na osnovu njihovog dogovora, članstva, udruživanja, autorizacije, akreditacije ili učešća.
2. Ovaj Pravilnik će važiti za sve doping kontrole za koje je nadležan NS/FS BiH, odnosno njegove članice, a u sljedećim slučajevima:
 - a) prisustva zabranjene supstance ili njenih metabolita ili markera u tjelesnom uzorku igrača;
 - b) korištenje ili pokušaj korištenja (primjena, unošenje, ubrizgavanje ili konzumiranje na bilo koji način) zabranjene supstance ili zabranjenog metoda (u daljem tekstu: doping sredstva) od strane igrača;
 - c) izbjegavanje, odbijanje, ili propuštanje davanja uzorka;
 - d) kršenja vezanih za neispunjavanje obaveze dostupnosti za testiranje;
 - e) neovlaštenog ometanja ili pokušaja ometanja bilo kojeg dijela doping kontrole;
 - f) nedozvoljenog posjedovanja doping sredstva;
 - g) neovlaštene prodaje, transporta, slanja, isporuke ili distribucije doping sredstva (bilo fizički, elektronski ili nekim drugim načinom) od strane igrača, osoba koje pomažu igraču ili posredstvom trećeg lica, bilo kojem licu koje je u ingerenciji neke organizacije u oblasti sporta, ili pokušaj takvih postupanja;
 - h) davanja ili pokušaja davanja, propisivanja ili pokušaja propisivanja bilo kojeg doping sredstva;

- i) saučesništva, asistiranja, podsticanja, pomaganja, podržavanja, prikrivanja, stvaranja uslova ili bilo kojeg drugog vida učešća u kršenju ili pokušaju kršenja anti-doping pravila ili u kršenju izrečene mjere zbog kršenja anti-doping pravila; i
 - j) zabranjenog udruživanja.
3. Kršenje anti-doping pravila po tačkama (a), (b), (f), (g), (h) i (i) ovog člana ne postoji u slučajevima odobrenih izuzeća za terapijske svrhe.
4. Pod osobama koje pomažu igraču podrazumijevaju se učitelji, treneri, menadžeri, agenti, osoblje tima, zvaničnici, zdravstveni radnici i zdravstveni saradnici kao i drugo osoblje koje radi sa ili vrši tretman igrača koji učestvuju ili se pripremaju za sportsko takmičenje.

Posebne obaveze igrača i tima

Član 2.

1. Igrači, drugi pojedinci, nogometne/fudbalske organizacije i drugi nogometni/fudbalski subjekti odgovorni su za to da budu upućeni u postupke koji predstavljaju povredu nekog anti-doping pravila i u supstance i metode, koji su uključeni u Listu zabranjenih supstanci i zabranjenih metoda.
2. Igrači imaju obavezu da se podvrgavaju doping testovima kako je propisano u poglavlju IV. Svaki igrač kojeg je odgovorno lice odredilo za doping testiranje, bilo kao rezultat ciljanog testiranja ili žrijebanja, dužan je obezbijediti uzorak urina a na zahtjev, i uzorak krvi, te je dužan da se podvrgne ljekarskom pregledu koji odgovorno lice smatra potrebnim i da saraduje s ovim licem u tom pogledu.
3. Igrač ima pravo na:
 - a) prisutnost timskog ljekara ili drugog predstavnika i, po potrebi, prevodioca;
 - b) da bude obaviješten o postupku uzimanja uzorka i da traži dodatne informacije o postupku uzimanja uzorka.
4. Igrač ima obavezu da:
 - a) bude pod direktnom opservacijom službenika za doping kontrolu Agencije za anti-doping kontrolu BiH ili pratioca cijelo vrijeme od trenutka kad je obaviješten o doping kontroli do trenutka kad je završeno uzimanje uzorka;
 - b) se pridržava procedure uzimanja uzorka (igrač će biti obaviješten o mogućim posljedicama odbijanja da se pridržava procedure);
 - c) se odmah javi na testiranje, osim ako ima validne razloge za odlaganje, kako je propisano odredbama Svjetskog anti-doping kodeksa.

5. Svaki igrač / tim koji bude identifikovan za uključivanje u nacionalnu registrovanu test grupu obavezan je da pruži informacije o boravištu kako je propisano Svjetskim anti-doping kodeksom. Igrači mogu predstavniku tima koji je određen za to delegirati obavezu pružanja informacije o boravištu igrača.

Nadležnost Agencije za anti-doping kontrolu BiH za vršenje testiranja

Član 3.

1. Agencija za anti-doping kontrolu BiH je nadležna za vršenje testiranja u svim klubovima i nad njihovim igračima koji su članovi asocijacije ili koji učestvuju u nekoj utakmici ili takmičenju u organizaciji NS/FS BiH.
2. U skladu s ovim Pravilnikom, Agencija za anti-doping kontrolu BiH će svoje testiranje fokusirati na igrače koji se nalaze u nacionalnoj registrovanoj test grupi i na igrače koji se takmiče ili se spremaju da se takmiče na utakmicama ili takmičenjima u organizaciji NS/FS BiH.
3. U okviru svojih nadležnosti, Agencija za anti-doping kontrolu BiH u skladu sa Zakonom o zaštiti ličnih podataka, Svjetskim anti-doping kodeksom, Sportskim pravilima i međunarodnim standardima WADA:
 - a) Prikuplja, čuva i vrši druge radnje obrade ličnih podataka igrača i drugih lica (ime i prezime, spol, datum rođenja, državljanstvo, broj ličnog dokumenta koji služi kao identifikacija igrača prilikom doping kontrole, adresu prebivališta i boravišta, kontakt telefon, adresu elektronske pošte, granu sporta i sportsku disciplinu kojom se lice bavi, naziv kluba u kome igrač obavlja sportske aktivnosti i fotografiju igrača), uključujući i obradu posebno osjetljivih podataka (zdravstveno stanje igrača, korištena medicinska sredstva),
 - b) Drugim ovlaštenim anti-doping organizacijama prenosi lične podatke igrača i drugog lica koji su neophodni za provođenje doping kontrole, odobravanje izuzetaka za terapijske svrhe i sankcioniranje igrača i drugog lica zbog kršenja anti-doping pravila.

II. DEFINICIJA I CILJEVI

Definicija i ciljevi

Član 4.

1. Prema odredbama ovog Pravilnika doping je strogo zabranjen. Doping se definiše kao povreda jednog ili više anti-doping pravila propisanih u poglavlju III. ovog Pravilnika.
2. Doping kontrola je postupak koji uključuje planiranje rasporeda doping kontrole, izbor igrača za doping kontrolu, prikupljanje i rukovanje uzorcima, laboratorijsku

analizu, vođenje rezultata, pretrase i žalbe.

3. Doping kontrola organizira se tako da je isključena svaka mogućnost zamjene uzoraka ili manipulacije bilo kakve vrste.
4. Doping kontrola organizira se kako na takmičenjima tako i izvan takmičenja, najavljeno i nenajavljeno.
5. Doping kontrola provodi se uzimanjem uzoraka urina i krvi ili primjenom druge autorizirane tehnike za detektiranje doping sredstava.
6. Osnovni ciljevi doping kontrole su trostruki:
 - a) podizanje i zaštita sportske etike;
 - b) očuvanje fizičkog zdravlja i mentalnog integriteta igrača;
 - c) osiguranje da svi takmičari imaju jednake šanse.

III. POVREDE ANTI-DOPING PRAVILA

Prisustvo zabranjene supstance

Član 5.

1. Lična obaveza svakog igrača je da se pobrine da u njegov organizam ne dospije neka zabranjena supstanca. Igrači su odgovorni za bilo koju zabranjenu supstancu ili metabolite iste ili markere otkrivene u njihovim uzorcima. U skladu s tim, nije neophodno da se s igračeve strane demonstrira krivica, greška, nemar ili upoznatost s upotrebom da bi se u skladu s ovim članom utvrdila povreda nekog anti-doping pravila.
2. Dokazi o kršenju anti-doping pravila u skladu s ovim članom utvrđuju se na osnovu jednog od slijedećih načina:
 - a) prisustvo zabranjene supstance ili njenih metabolita ili markera u igračevom „A” uzorku kad igrač odustaje od analize uzorka „B” pa se uzorak „B” ne analizira;
 - b) kada se analizira igračev uzorak „B”, a analiza igračevog uzorka „B” potvrdi prisustvo zabranjene supstance ili njenih metabolita ili markera nađenih u igračevom uzorku „A”.
3. Izuzimajući one supstance za koje je u Listi zabranjenih supstanci konkretno postavljen kvantitativni prag, prisustvo bilo koje količine zabranjene supstance ili njenih metabolita ili markera u igračevom uzorku predstavljaće povredu anti-doping pravila.
4. Kao izuzetak od opšteg pravila iz ovog člana, Lista zabranjenih supstanci ili Međunarodni standardi mogu utvrditi posebne kriterije za evaluaciju zabranjenih supstanci koje mogu biti proizvedene i endogenim putem.

Korištenje zabranjene supstance ili zabranjenog metoda ili pokušaj korištenja

Član 6.

1. Da bi se smatralo kako je počinjena povreda anti-doping pravila, dovoljna je upotreba ili pokušaj upotrebe neke zabranjene supstance ili metoda. Da li je upotreba ili pokušaj upotrebe neke zabranjene supstance ili metoda uspješan ili neuspješan je irelevantno.

Odbijanje davanja uzorka ili nepodvrgavanje davanju uzorka

Član 7.

1. Izbjegavanje davanja uzorka ili odbijanje ili propuštanje davanja uzorka (bez opravdanja) poslije prijema obavještenja (notifikacije) o doping kontroli kao što je predviđeno ovim Pravilnikom ili izbjegavanje uzimanja uzorka na drugi način, predstavlja povredu anti-doping pravila.

Kršenja vezana za neispunjavanje obaveze dostupnosti

Član 8.

1. Bilo koja kombinacija od tri propuštena testa i/ili propust pri popunjavanju obrasca o lokaciji sportiste, prema uslovima definisanim u Međunarodnim standardima za testiranje i istragu, unutar perioda od 12 mjeseci, od strane sportiste koji je uključen u registrovanu test grupu sportista predstavljaju kršenja vezana za neispunjavanje obaveze dostupnosti.

Ometanje ili pokušaj ometanja bilo kojeg dijela doping kontrole

Član 9.

1. Ponašanje sportiste kojim se namjerno ometa ili vrši pokušaj ometanja doping kontrole ili bilo kojeg dijela doping kontrole, davanje lažnih informacija Agenciji za antidoping kontrolu BiH ili zastrašivanjem ili pokušaj zastrašivanja potencijalnog svjedoka, zabranjeno je i kažnjivo u skladu sa odredbama Svjetskog anti-doping pravilnika.

Posjedovanje zabranjenih supstanci i metoda

Član 10.

1. Posjedovanje zabranjenih supstanci i metoda od strane igrača podrazumijeva da igrač u toku takmičenja posjeduje bilo koji zabranjeni metod ili zabranjenu supstancu, ili kad igrač

izvan takmičenja posjeduje bilo koji zabranjeni metod ili zabranjenu supstancu koji/a je zabranjen/a izvan takmičenja, izuzev ako igrač može dokazati da ih posjeduje na osnovu sa izuzeća za terapijsku upotrebu koje je odobreno u skladu sa propisima i Međunarodnim standardima ili ako pruži drugo prihvatljivo opravdanje.

2. Posjedovanje zabranjenih supstanci i metoda od strane člana pomoćnog sportskog osoblja podrazumijeva da član pomoćnog sportskog osoblja u toku takmičenja posjeduje bilo koji zabranjeni metod ili zabranjenu supstancu, ili kad član pomoćnog sportskog osoblja izvan takmičenja posjeduje bilo koji zabranjeni metod ili zabranjenu supstancu koji/a je zabranjen/a izvan takmičenja u vezi s igračem, takmičenjem ili treningom, izuzev ako član pomoćnog sportskog osoblja može dokazati da ih posjeduje na osnovu izuzeća za terapijsku upotrebu koje je igraču odobreno u skladu sa propisima i Međunarodnim standardima ili ako pruži drugo prihvatljivo opravdanje.

Prodaja, transport, slanje, isporuka ili distribucija bilo koje zabranjene supstance ili metode ili pokušaj takvog postupanja predstavlja kršenje antidoping pravila

Član 11.

1. Davanje ili pokušaj davanja zabranjenog metoda ili zabranjene supstance predstavlja čin davanja ili pokušaj davanja zabranjenog metoda ili zabranjene supstance bilo kojem igraču u toku takmičenja, ili davanje ili pokušaj davanja zabranjenog metoda ili zabranjene supstance bilo kojem igraču izvan takmičenja, ili asistiranje, ohrabrivanje, pomaganje, nagovaranje, prikrivanje ili bilo koja druga vrsta saučesništva u kršenju anti-doping pravila ili pokušaju kršenja anti-doping pravila.

Primjena ili pokušaj primjene bilo koje zabranjene supstance ili zabranjene metode

Član 12.

1. Primjena ili pokušaj primjene bilo koje zabranjene supstance ili zabranjene metode tokom takmičenja, ili primjena ili pokušaj primjene bilo koje zabranjene supstance ili bilo koje zabranjene metode koja je zabranjena izvan takmičenja, kažnjavaće se u skladu sa odredbama ovog Pravilnika i Svjetskog anti-doping kodeksa.

Saučesništvo

Član 13.

1. Zabranjeno je pomaganje, ohrabrivanje, poticanje, planiranje, zataškavanje ili bilo koja vrsta namjernog saučesništva koje uključuje prekršaj anti-doping pravila te pokušaj prekršaja anti-doping pravila od strane druge osobe.

Zabranjeno udruživanje

Član 14.

1. Zabranjeno je udruživanje igrača ili druge osobe koja potpada pod nadležnost NS/FS BiH u profesionalnom svojstvu ili svojstvu koje se odnosi na nogomet/fudbal s bilo kojom osobom iz pratećeg osoblja igrača koja:
 - a) Odrađuje razdoblje zabrane; ili
 - b) Djeluje kao punomoćnik ili posrednik za igrača ili druge osobe koja potpada pod nadležnost NS/FS BiH u profesionalnom svojstvu ili svojstvu koje se odnosi na nogomet/fudbal.
2. Kako bi se ovaj član primjenjivao, neophodno je da je igrač ili druga osoba prethodno bila pismenim putem obaviještena od strane NS/FS BiH nadležne za igrača ili drugu osobu, o diskvalificirajućem statusu pratećeg osoblja igrača i potencijalnim posljedicama zabranjenog udruživanja, kako bi igrač ili druga osoba mogla razumno izbjeći udruživanje.
3. NS/FS BiH će također koristiti razumne napore za savjetovanje pratećeg osoblja igrača ili druge ovlaštene osobe, kako bi isti mogli, u roku od 15 dana, pristupiti i objasniti NS/FS BiH i Agenciji za antidoping kontrolu BiH kako se kriteriji opisani u čl. 14. na predmetnog igrača ne primjenjuju.
4. Teret je na igraču ili drugoj osobi da dokaže kako bilo kakvo udruživanje s pratećim osobljem igrača, opisano u čl. 14. nije u profesionalnom svojstvu ili u svojstvu vezanom uz nogomet/fudbal.
5. Ukoliko je NS/FS BiH upoznat da se kriteriji opisani u ovom članu mogu primijeniti na bilo kojeg člana pratećeg osoblja igrača, te informacije dužan je dostaviti Agenciji za anti-doping kontrolu BiH.

IV. DOKAZ O DOPINGU

Teret dokazivanja i standard dokaza

Član 15.

1. Na Agenciji za anti-doping kontrolu BiH je teret dokazivanja da je prekršeno neko anti-doping pravilo. Standard dokaza će biti da li je Agencija utvrdila da je prekršeno neko anti-doping pravilo, imajući na umu težinu takve optužbe. U svim slučajevima, standard dokaza je snažniji od običnog vaganja vjerovatnoće, ali je slabiji od dokaza izvan razumne sumnje. Postupak utvrđivanja odgovornosti licu koje je prekršilo antidoping pravila provodi NS/FS BiH.

2. Kad Pravilnik o anti-dopingu NS/FS BiH teret dokazivanja stavlja na igrača ili drugo lice optuženo za povredu anti-doping pravila, kako bi pobio neku pretpostavku ili utvrdio specificirane činjenice ili okolnosti, standard dokaza će naći vaganjem vjerovatnoće, izuzev u slučajevima propisanim Svjetskim anti-doping kodeksom a pod uslovima u kojima igrač mora zadovoljiti snažniji teret dokaza.

Metode utvrđivanja činjenica i pretpostavki

Član 16.

Činjenice koje se odnose na povredu anti-doping pravila mogu se utvrđivati svakim pouzdanim sredstvom, uključujući priznanje. Sljedeća pravila dokazivanja primjenivaće se u slučajevima dopinga:

- a) Pretpostavlja se da su laboratorije koje je akreditovala Agencija za anti-doping kontrolu BiH vodile postupak analize uzorka i procedure čuvanja u skladu sa važećim standardom za laboratorije. Igrač ili drugo lice mogu pobiti ovu pretpostavku utvrđujući da je došlo do odstupanja od važećeg standarda za laboratorije za koje se rezonski smatra da je moglo dovesti do nepovoljnog nalaza analize uzorka.
- b) Ukoliko igrač ili drugo lice pobije prethodnu pretpostavku dokazujući da je došlo do odstupanja od Međunarodnog standarda za laboratorije za koje se rezonski smatra da je dovelo do nepovoljnog nalaza analize uzorka, na NS/FS BiH će biti teret dokazivanja da takvo odstupanje nije dovelo do nepovoljnog nalaza analize uzorka.
- c) Odstupanja od bilo kojeg drugog važećeg standarda ili nekog drugog anti-doping pravila ili politike koja nisu dovela do nepovoljnog nalaza analize uzorka ili povreda nekog drugog anti-doping pravila neće obezvrijediti takve rezultate. Ukoliko igrač ili drugo lice tvrdi da je postojalo odstupanje od nekog drugog standarda ili nekog drugog anti-doping pravila ili politike za koje se rezonski smatra da je moglo dovesti do nepovoljnog nalaza analize uzorka ili povreda nekog drugog anti-doping pravila, na NS/FS BiH će biti teret utvrđivanja da takvo odstupanje nije dovelo do nepovoljnog nalaza analize uzorka ili činjenične osnove za povredu nekog anti-doping pravila.
- d) Činjenice utvrđene odlukom nadležnog suda ili nadležnog disciplinskog komiteta s nadležnom jurisdikcijom na koju nije uložena žalba biće neoboriv dokaz protiv igrača ili drugog lica na koje se odnosi odluka, osim ako igrač ili drugo lice tvrde da su tom odlukom prekršeni principi prirodne pravde.

V. LISTA ZABRANJENIH SUPSTANCI I IZUZEĆA ZA TERAPIJSKU UPOTREBU

Lista zabranjenih supstanci

Član 17.

1. Zabranjene supstance i zabranjeni metodi obuhvataju sve što se nalazi na Listi

zabranjenih supstanci i metoda koju objavljuje i revidira WADA (vidi www.wada.ama.org.)

2. Izuzev kad NS/FS BiH objavi drugačije, Lista zabranjenih supstanci i metoda i revizije iste stupaju na snagu u okviru Pravilnika o anti-dopingu NS/FS BiH tri mjeseca nakon što WADA objavi Listu zabranjenih supstanci i metoda. NF/FS BiH će cirkularnim pismom pravovremeno obavijestiti klubove u takmičenjima kojima neposredno rukovodi, kao i asocijacije članice, o eventualnim izmjenama i dopunama Liste zabranjenih supstanci i metoda.
3. Određivanje od strane WADA-e koje će zabranjene supstance i zabranjeni metodi biti uključeni u Listu zabranjenih supstanci i zabranjenih metoda i klasifikacija tih supstanci u kategorije u Listi zabranjenih supstanci i zabranjenih metoda je konačno i ne može ga preispitivati igrač ili drugo lice na osnovu argumenta da predmetna supstanca ili metod nije bio maskirni agens ili da nije imao/la potencijal da poboljša performanse, da ne predstavlja zdravstveni rizik, ili ne krši sportski duh.

Specificirane supstance

Član 18.

1. Za potrebe primjenjivanja uslova propisanih poglavljem XI, sve zabranjene supstance će biti specificirane supstance izuzev supstanci klasifikovanih kao anabolički agensi i hormoni i oni stimulansi, hormonski agonisti i modulatori koji su kao takvi identifikovani u Listi zabranjenih supstanci i zabranjenih metoda. Zabranjeni metodi neće biti specificirane supstance.

Izuzeća za terapijsku upotrebu

Član 19.

1. Svaki igrač koji konsultuje ljekara i kojem je propisan tretman ili lijek za terapijske potrebe dužan je ispitati da li taj prepisani tretman ili lijek sadrži zabranjene supstance ili zabranjene metode. Ukoliko je to slučaj, igrač je dužan zahtijevati alternativni tretman.
2. Ukoliko ne postoji alternativni tretman, igrač s dokumentovanim zdravstvenim stanjem koje zahtijeva upotrebu zabranjene supstance ili zabranjenog metoda dužan je prvo obezbijediti izuzeće za terapijsku upotrebu (TUE). Ipak, TUE će biti odobravani samo u slučajevima jasne i neizbježne kliničke potrebe gdje igrač ne može ostvariti takmičarsku prednost.
3. Postupak apliciranja za izuzeće i odobravanja izuzeća za terapijsku upotrebu strogo se pridržava procedura koje propisuje WADA-in Međunarodni standard za izuzeća za terapijsku upotrebu.
4. Igrači koji su uključeni u nacionalnu registrovanu test grupu, TUE mogu dobiti samo u skladu sa pravilima koja propisuje Agencija za antidoping kontrolu BiH. Pojednosti o

proceduri apliciranja nalaze se u Dodatku C ovog Pravilnika. TUE-i koje NS/FS BiH odobri u skladu s ovim pravilima moraju biti prijavljeni igračevom klubu i asocijaciji.

VI. TESTIRANJE

Opšta pravila testiranja

Član 20.

1. U skladu s ovim Pravilnikom, svaki igrač može postati predmet testiranja Agencije za anti-doping kontrolu BiH ili druge nadležne antidoping organizacije tokom takmičenja na utakmicama u kojima se takmiči i testiranja izvan takmičenja u svako vrijeme i na svakom mjestu. Testiranje uključuje testove urina i krvi.
2. Pojedinačno testiranje igrača će se provoditi bez najave. Za testiranje u toku takmičenja, izabrano mjesto može biti poznato unaprijed, ali neće biti otkriveno igraču do trenutka obavještenja o testiranju.

Plan rasporeda testiranja

Član 21.

1. Agencija za anti-doping kontrolu BiH napraviće plan rasporeda testiranja za efikasno i efektno testiranje u toku i izvan takmičenja svih igrača nad kojima NS/FS BiH ima nadležnost.
2. Prilikom pripreme plana rasporeda testiranja Agencija za anti-doping kontrolu BiH razmotriće doping rizike u fudbalu zasnovane na:
 - a) FIFA-inoj bazi podataka o doping kontroli o pozitivnim testovima i otkrivenim supstancama;
 - b) WADA-inim statistikama;
 - c) Istoriji dopinga u nogometu/fudbalu;
 - d) Kalendaru takmičenja, uključujući pauze na kraju sezona;
 - e) Broju igrača;
 - f) Fizičkim zahtjevima nogometa/fudbala; i
 - g) Istraživanju.
3. Agencija za anti-doping kontrolu BiH će takođe uzeti u obzir anti-doping aktivnosti

saveza članica NS/FS BiH, snagu nacionalnog anti-doping programa države, te rezultate ranijih ciklusa planiranja rasporeda testiranja. Taj plan će se po potrebi ažurirati na osnovu tog redovnog pregleda.

4. Vrsta uzetih uzoraka određivaće se na osnovu vremena testiranja i broja uzetih uzoraka krvi i urina, uključujući uzorke uzete izvan takmičenja i tokom takmičenja, radi osiguranja optimalnog preventivnog djelovanja i otkrivanja dopinga u fudbalu.
5. Član pomoćnog sportskog osoblja i/ili bilo koje drugo lice u sukobu interesa neće biti uključeno u planiranje rasporeda testiranja za svoje igrače ili u postupak selekcije igrača za testiranje.
6. Agencija za anti-doping kontrolu BiH vodiće evidenciju o podacima za planiranje rasporeda testiranja radi koordinacije aktivnosti testiranja s drugim anti-doping organizacijama.
7. Lanac čuvanja uzoraka mora osigurati da uzorci i prateći dokumentacioni obrasci u laboratoriju stižu zajedno.

Procedura testiranja

Član 22.

1. Odredbe koje se tiču procedura za odabir izgrača za testiranje, plan rasporeda testiranja (metodom slučajnog odabira ili ciljanog testiranja), nepridržavanja doping kontrole kao i osoblja za uzimanje uzoraka: službenika za doping kontrolu, pomoćnika i pratioca, bit će regulisane Pravilnikom za borbu protiv dopinga u sportu u Bosni i Hercegovini te Svjetskim antidoping kodeksom, a iste će biti provedene od strane Agencije za antidoping kontrolu BiH.

VII. ANALIZA UZORAKA

Korištenje akreditovanih laboratorija

Član 23.

1. Analizu uzoraka vršiće laboratorija koja je registrovana i akreditovana od strane WADA. Izbor laboratorije ili metoda koja se koristi za analizu uzorka, određivaće Agencije za antidoping kontrolu BiH ili druga ovlaštena antidoping organizacija.

Supstance koje su predmet detekcije

Član 24.

1. Uzorci će biti analizirani kako bi se otkrile zabranjene supstance i zabranjeni metodi sa Liste zabranjenih supstanci i metoda i drugih suspcanci prema nalogu WADAE u skladu s njenim programom praćenja.

Istraživanje na uzorcima

Član 25.

1. Nikakav uzorak se ne smije koristiti za potrebe koje nisu one koje su opisane u prethodnom članu bez pismene saglasnosti igrača. Nadalje, NS/FS BiH snažno destimulira korištenje uzoraka za potrebe koje nisu one koje su opisane u prethodnom članu, naročito za potrebe istraživanja, jer je to u suprotnosti sa osnovnim naučnim principima i neće biti dozvoljeno za utakmice / takmičenja kojim rukovodi NS/FS BiH.

Standardi za analizu uzoraka i izvještavanje, ponavljanje uzoraka, vlasništvo, smjernica

Član 26.

1. Odredbe koje se odnose na standarde za analizu uzoraka i izvještavanje, ponavljanje uzoraka te vlasništvo regulisane su Pravilnikom za borbu protiv dopinga u sportu u Bosni i Hercegovini te Svjetskim antidoping kodeksom, a iste se provode od strane Agencije za antidoping kontrolu BiH. Ukoliko se u bilo kojoj fazi pojavi neko pitanje ili problem u vezi analize ili tumačenja rezultata određenog uzorka, osoba u laboratoriji odgovorna za analizu može konsultovati Agenciju za antidoping kontrolu BiH radi davanja smjernica.

VIII. VOĐENJE I PROVOĐENJE REZULTATA

Postupak vođenja

Član 27.

1. Nakon obavještenja o nepovoljnom nalazu analize ili drugoj povredi anti-doping pravila u okviru Pravilnika o anti-doping u NS/FS BiH, to pitanje će biti predmet rezultata nadalje propisanog postupka vođenja.
2. U slučaju igrača kojeg je testirala Agencija za antidoping kontrolu BiH, postupak utvrđivanja kršenja antidoping pravila vodiće Disciplinska komisija NS/FS BiH.
3. Za potrebe ovog poglavlja, spominjanje Agencije za antidoping kontrolu BiH će gdje god to odgovara biti shvaćeno kao relevantna osoba ili tijelo asocijacije, a pozivanje na igrača će gdje god to odgovara biti shvaćeno kao pomoćno sportsko

osoblje ili neka druga osoba.

Inicijalni pregled, analiza uzorka „B”, revizija atipičnog nalaza pasoša i nepovoljnog nalaza pasoša, revizija propusta dostave informacija o kretanju

Član 28.

1. Inicijalni pregled u pogledu nepovoljnih/atipičnih nalaza analize i obavještavanje, analiza uzorka „B” kod nepovoljnih nalaza analize, revizija atipičnog nalaza pasoša i nepovoljnog nalaza pasoša, revizija propusta dostave informacija o kretanju, regulisano je Pravilnikom za borbu protiv dopinga u sportu u Bosni i Hercegovini te Svjetskim antidoping kodeksom.
2. Odredbe koje se odnose na pitanja iz stava 1. ovog člana provode se od strane Agencije za antidoping kontrolu BiH i Disciplinske komisije NS/FS BiH.

Obavještavanje

Član 29.

1. Po primitku nepovoljnog ili atipičnog nalaza analize „A” uzorka, NS/FS BiH će provesti pregled da bi odredila:
 - a) da li je igraču bilo ili će biti odobreno važeće izuzeće za terapijsku upotrebu zabranjene supstance;
 - b) da li postoji očigledno odstupanje od Međunarodnog standarda za laboratorije, Međunarodnog standarda za testiranje ili drugog važećeg propisa u Pravilniku o antidoping u NS/FS BiH u tolikoj mjeri koja podriva validnost nalaza.
2. Ukoliko inicijalni pregled nepovoljnog nalaza analize ne otkrije postojanje važećeg TUE-a ili prava na TUE ili odstupanje koje je dovelo do nepovoljnog nalaza analize, NS/FS BiH će odmah na povjerljiv način obavijestiti predsjedavajućeg Disciplinske komisije NS/FS BiH, predsjedavajućeg Komiteta za sportsku medicinu NS/FS BiH te igračev klub o pozitivnom rezultatu „A” uzorka, kako je to propisano Disciplinskim pravilnikom NS/FS BiH. Igrač će biti istovremeno obaviješten na način propisan stavom 4. ovoga člana.
3. Ukoliko inicijalni pregled atipičnog nalaza analize ne otkrije postojanje važećeg TUE-a ili očigledno odstupanje koje je dovelo do atipičnog nalaza analize, NS/FS BiH će provesti potrebnu istragu. Nakon okončanja istrage, igrač (na dole opisan način), njegov klub i predmetna asocijacija će biti obaviješteni o tome da li će se atipični nalaz pretvoriti u nepovoljan nalaz analize.
4. U slučaju nepovoljnog nalaza analize, igrač mora biti smjesta obaviješten o:

- a) nepovoljnom nalazu analize;
- b) prekršenom anti-doping pravilu;
- c) njegovom pravu da odmah zahtijeva analizu uzorka „B“ i, ukoliko ne podnese taj zahtjev u roku koji odredi NS/FS BiH o činjenici da se može smatrati kako se igrač odrekao prava traženja analize uzorka „B“. Igrač će istovremeno biti obaviješten da ukoliko je tražena analiza uzorka „B“, sve relevantne laboratorijske troškove snosi sam igrač, izuzev ako „B“ uzorak ne uspije potvrditi „A“ uzorak, u kojem slučaju troškove snosi NS/FS BiH;
- d) činjenici da se analiza uzorka „A“ može provesti na zahtjev NS/FS BiH neovisno od igračeve odluke u tom pogledu;
- e) planiranom datumu, vremenu i mjestu za analizu uzorka „B“ ako igrač ili NS/FS BiH odluči da traži analizu uzorka „B“;
- f) mogućnosti da igrač i/ili predstavnik igrača prisustvuje otvaranju i analiziranju uzorka „B“;
- g) pravu igrača da traži kopije paketa laboratorijske dokumentacije uzorka „A“ i uzorka „B“, koji uključuju informacije koje propisuje Međunarodni standard za laboratorije;
- h) pravu igrača da pruži objašnjenje kao svoj odgovor na tvrdnju o povredi anti-doping pravila u roku koji odredi NS/FS BiH.

Pregled povreda ostalih anti-doping pravila

Član 30.

1. U slučaju eventualne povrede nekog anti-doping pravila kada nema nepovoljnog nalaza analize niti atipičnog nalaza, NS/FS BiH provešće istragu koju smatra neophodnom, zasnovanu na činjenicama predmetnog slučaja.
2. Kada NS/FS BiH ima razloga da opravdano sumnja u mogućnost prekršaja nekog anti-doping pravila, ista će odmah obavijestiti igrača, Agenciju za antidoping kontrolu BiH, igračev klub i asocijaciju o povredi anti-doping pravila, te o osnovi sumnje za predmetnu povredu.
3. Igraču će biti data prilika da, u roku koji odredi Disciplinski komitet NS/FS BiH, pruži objašnjenje kao odgovor na tvrdnje da je povrijedio anti-doping pravilo.

Povlačenje iz sporta

Član 31.

1. Ukoliko se igrač povuče iz sporta u toku postupka vođenja rezultata, NS/FS BiH zadržava nadležnost da dovrši postupak vođenja rezultata.
2. Ukoliko se igrač povuče iz sporta prije početka postupka vođenja rezultata, Agencija za antidoping kontrolu BiH, ima jurisdikciju da provede vođenje rezultata.

Povratak u takmičenje igrača koji se povukao

Član 32.

1. Ukoliko se igrač međunarodne ili nacionalne razine koji se nalazi u registrovanoj grupi za testiranje povuče i nakon toga se poželi vratiti aktivnom učešću u sportu, igrač se neće takmičiti u međunarodnim ili nacionalnim takmičenjima dok se ne stavi na raspolaganje za testiranje, dajući prethodnu šestomjesečnu pismenu obavijest Agenciji za antidoping kontrolu BiH i NS/FS BiH, koji mogu odobriti izuzeće od pravila o šestomjesečnoj pismenoj obavijesti u slučaju kad bi striktna primjena ovog pravila bila očito nepoštena prema igraču. Protiv ove odluke nije moguće uložiti žalbu.
2. Ukoliko se igrač povuče iz sporta za vrijeme trajanja razdoblja zabrane i naknadno se želi vratiti aktivnom učešću u sportu, igrač se neće takmičiti u međunarodnim ili nacionalnim takmičenjima dok se ne stavi na raspolaganje za testiranje, dajući prethodnu šestomjesečnu obavijest (ili obavijest istovjetnu razdoblju zabrane koje preostaje s datumom povlačenja igrača, ukoliko je to razdoblje duže od šest mjeseci), Agenciji za antidoping kontrolu BiH. Agencija za antidoping kontrolu BiH može odobriti izuzeće od pravila o šestomjesečnoj pismenoj obavijesti u slučaju kad bi striktna primjena ovog pravila bila očito nepoštena prema igraču. Protiv ove odluke nije moguće uložiti žalbu.
3. Ukoliko se igrač povuče za vrijeme trajanja postupka upravljanja rezultatima, NS/FS BiH zadržava nadležnost da dovrši svoj postupak upravljanja rezultatima.
4. Ukoliko se igrač povuče prije početka bilo kakvog postupka upravljanja rezultatima, Agencija za antidoping kontrolu BiH nadležna je za upravljanje rezultatima za ono vrijeme kada je igrač počinio prekršaj anti-doping pravila.

IX. PRIVREMENA SUSPENZIJA

Nadležnost

Član 33.

1. Kad se potvrdi sumnja da je prekršeno neko anti-doping pravilo u vezi sa bilo kojim testom koje je provela Agencija za antidoping kontrolu BiH, Disciplinska komisija NS/FS BiH biće zadužena za izricanje relevantne privremene suspenzije.
2. Za potrebe ovog poglavlja, spominjanje Disciplinske komisije NS/FS BiH će, gdje god je prikladno, biti shvaćeno kao relevantna osoba ili tijelo NS/FS BiH, a spominjanje igrača će, gdje god je prikladno, biti shvaćeno kao bilo koji član pomoćnog sportskog osoblja ili neka druga osoba.

Obavezna privremena suspenzija

Član 34.

1. U slučaju nepovoljnog nalaza analize uzorka „A“ u pogledu prisustva zabranjene supstance, koja nije specificirana supstanca, neodložno se izriče privremena suspenzija nakon izvršenog pregleda i obavještenja opisanog u članu 29.
2. Privremena suspenzija ne može se odrediti ako sportisti ili drugoj osobi nije omogućeno: (a) kratko saslušanje prije određivanja privremene suspenzije ili u kratkom roku nakon određivanja privremene suspenzije; ili (b) saslušanje po ubrzanom postupku ili u kratkom roku nakon određivanja privremene suspenzije (8 dana).

Opciona privremena suspenzija

Član 35.

1. U slučaju nepovoljnog nalaza analize uzorka „A“ u pogledu specificirane supstance ili drugih povreda anti-doping pravila, može biti izrečena privremena suspenzija.
2. Privremena suspenzija ne može se odrediti ako sportisti ili drugoj osobi nije omogućeno:
 - (a) kratko saslušanje prije određivanja privremene suspenzije ili u kratkom roku nakon određivanja privremene suspenzije; ili
 - (b) saslušanje po ubrzanom postupku ili u kratkom roku nakon određivanja privremene suspenzije (8 dana).

Dobrovoljno prihvatanje suspenzije

Član 36.

1. Alternativno, igrač može dobrovoljno prihvatiti suspenziju pod uslovom da to potvrdi u pisanoj formi Disciplinskoj komisiji NS/FS BiH.
2. Dobrovoljno prihvatanje suspenzije će biti na snazi tek od datuma primitka igračeve pisane potvrde o prihvatanju dobrovoljne suspenzije u NS/FS BiH. Stoga je asocijacija koja je zaprimila pisanu potvrdu igrača o prihvatanju dobrovoljne suspenzije (ukoliko to nije NS/FS BiH) dužna hitno dostaviti kopiju igračevog dobrovoljnog pristanka na privremenu suspenziju NS/FS BiH.

Obavještanje

Član 37.

1. Igrač koji je privremeno suspendovan biće smjesta obavješten o tome kako je propisano članom 29. ovog Pravilnika.
2. Agencija za antidoping kontrolu BiH obavještava NS/FS BiH o kršenju antidoping pravila istovremeno sa obavještanjem igrača, UEFA/FIFA i WADA. Nakon zaprimljenje obavijesti o kršenju antidoping pravila, a ovisno o kršenju kojeg antidoping pravila je riječ, NS/FS BiH izriče suspenziju uz poštivanje principa Svjetskog antidoping kodeksa.

Povlačenje suspenzije

Član 38.

1. Ukoliko je bila izrečena privremena suspenzija na osnovu nepovoljnog nalaza analize uzorka „A“, a kasnija analiza uzorka „B“ nije potvrdila analizu uzorka „A“, tada igrač neće biti predmet nikakve dalje privremene suspenzije po osnovu povreda člana 5.
2. U slučaju kad su igrač ili tim eliminisani iz takmičenja zbog kršenja člana 5., a kasnija analiza uzorka „B“ ne potvrdi analizu uzorka „A“, a kad je, bez posljedica po takmičenje, još uvijek moguće da igrač ili njegov tim budu vraćeni u takmičenje, igrač ili tim mogu nastaviti učestvovati u predmetnom takmičenju.
3. U vezi st. 2. ovog člana, u bilo kojem drugom slučaju gdje vraćanje utječe na takmičenje, igrač ili ekipa neće nastaviti sa učešćem u takmičenju i neće potraživati nikakvu naknadu za štetu ili drugu naknadu.

X. PRAVEDNO SASLUŠANJE

Nadležnost

Član 39.

1. Kad se iznese tvrdnja da je prekršeno neko anti-doping pravilo taj slučaj će biti podnesen Disciplinskoj komisiji NS/FS BiH.
2. Disciplinska komisija NS/FS BiH će odlučiti o odgovarajućim sankcijama u skladu sa Pravilnikom o anti-doping u NS/FS BiH, Svjetskim antidoping kodeksom i Disciplinskim pravilnikom NS/FS BiH.
3. U slučaju igrača kojeg je testirala ADA BIH, ADA BIH ima ekskluzivno pravo da objavi rezultate testa i relevantne mjere u vezi istog.
4. Za potrebe poglavlja X i XI, spominjanje Disciplinske komisije NS/FS BiH će, gdje god je prikladno, biti shvaćeno kao relevantni organ asocijacije, a spominjanje igrača će, gdje god je prikladno, biti shvaćeno kao bilo koji član pomoćnog sportskog osoblja ili neka druga osoba.

Pravo na pravedno saslušanje

Član 40.

1. Svaki privremeno suspendovani igrač ili igrač koji je prihvatio dobrovoljnu supenziju imaće pravo da traži saslušanje pred Disciplinskom komisijom NS/FS BiH prije izricanja bilo kakve definitivne sankcije u skladu sa Pravilnikom o anti-doping u Disciplinskim pravilnikom NS/FS BiH.

Principi za vođenje pretresa

Član 41.

1. Disciplinska komisija NS/FS BiH će biti pravedna i nepristrasna, a pretresni postupak će poštovati sljedeća igračeva prava:
 - a) pravo na pravnu pomoć i prevodioca na trošak igrača;
 - b) pravo da bude informisan na pošten i pravovremen način o tvrdnji da je povrijedio neko anti-doping pravilo;
 - c) pravo da odgovori na tvrdnju o povredi anti-doping pravila i posljedicama koje su rezultat iste;
 - d) pravo prezentiranja dokaza, uključujući pravo da poziva i ispituje svjedoke;

- e) pravo na pravovremenu, pisanu i obrazloženu odluku, u kojoj se konkretno objašnjava/ju razlog/zi za određivanje perioda u kojem igrač nema pravo nastupa.

Razmatranja Disciplinske komisije NS/FS BiH

Član 42.

1. Disciplinska komisija NS/FS BiH će na pretresu prvo razmatrati da li je počinjen neki anti-doping prekršaj.
2. Ako nakon zahtjeva, koji mu je upućen u razumnom vremenu prije pretresa, da se pojavi na pretresu (bilo lično ili telefonski, kako naloži Disciplinska komisija NS/FS BiH) i da odgovara na pitanja Disciplinske komisije NS/FS BiH, igrač odbije da se pojavi na pretresu, Disciplinska komisija NS/FS BiH može na osnovu toga izvući negativan zaključak o igraču za kojeg se tvrdi da je povrijedio pravila anti-dopinga.
3. Ukoliko Disciplinska komisija NS/FS BiH smatra da je prekršeno anti-doping pravilo ista će razmotriti odgovarajuće mjere primjenjive po osnovu ovog Pravilnika, Svjetskog anti-doping kodeksa te Međunarodnim standardima, prije izricanja bilo kojeg perioda zabrane igranja. Igrač će imati priliku da pokaže da u njegovom slučaju postoje specifične ili izuzetne okolnosti koje opravdavaju smanjenje sankcije koja bi inače bila izrečena.
4. Kad nema pretresa, Disciplinska komisija NS/FS BiH će razmatrati da li je prekršeno anti-doping pravilo te, ako jeste, koje mjere treba poduzeti na osnovu sadržaja dosjea predmeta, i donijeti obrazloženu odluku u kojoj pojašnjava poduzete akcije.

Postupak tokom takmičenja

Član 43.

1. Ako je u toku takmičenje, Disciplinska komisija NS/FS BiH može ubrzati postupak. Ona može sama provesti pretres ili poduzeti druge mjere po svom nahođenju, posebno kada rješenje o povredi anti-doping pravila može uticati na učešće igrača u takmičenju.

XI. SANKCIJE

Sankcije

Član 44.

1. Kazne za pojedince, kazne protiv sportskih organizacija te mjere u timskim sportovima, izriču se u skladu sa Svjetskim anti-doping kodeksom i Međunarodnim standardima.

Početak perioda zabrane

Član 45.

1. Period trajanja zabrane počinje teći čim odluka o zabrani bude saopštena predmetnom igraču, izuzev u slučaju dole opisanih situacija. Period eventualne privremene suspenzije igrača (bilo izrečene ili dobrovoljno prihvaćene) biće uračunat u ukupni period trajanja izrečene zabrane.
2. U slučaju značajnih kašnjenja pretresnog postupka ili drugih aspekata doping kontrole koji se ne mogu pripisati igraču, Disciplinska komisija NS/FS BiH može odrediti period zabrane koji počinje već na datum uzimanja uzorka ili datum na koji je počinjena druga povreda anti-doping pravila.
3. Kada igrač promptno (što u svakom slučaju za igrača znači period prije nego ponovno započne takmičenje) prizna povredu anti-doping pravila, a nakon što ga NS/FS BiH suoči sa povredom anti-doping pravila, period trajanja zabrane može početi već na datum uzimanja uzorka ili s datumom na koji je počinjena druga povreda anti-doping pravila. Međutim, u svakom slučaju kad se primjenjuje ovaj član, igrač mora odslužiti najmanje jednu polovinu perioda trajanja zabrane, počevši od datuma kad je igrač prihvatio sankciju, datuma na koji je saznao za odluku kojom se izriče sankcija, ili datuma na koji je na neki drugi način izrečena sankcija.
4. Ukoliko je izrečena privremena suspenzija, a igrač je ispoštuje, tada će igraču biti priznat dotadašnji period privremene suspenzije i isti će biti uračunat u period trajanja zabrane koja može biti izrečena nakon završetka privremene suspenzije.
5. Ukoliko igrač dobrovoljno prihvati privremenu suspenziju NS/FS BiH u pisanom obliku i nakon toga se uzdrži od takmičenja, igraču će biti priznat navedeni period dobrovoljne privremene suspenzije i uračunat u period trajanja zabrane koja može biti izrečena nakon završetka privremene suspenzije. Primjerak igračevog dobrovoljnog prihvatanja privremene suspenzije biće promptno dostavljen svakoj strani koja ima pravo da primi obavještenje o potencijalnoj povredi anti-doping pravila.
6. Bilo koji period prije efektivnog datuma privremene suspenzije ili dobrovoljne privremene suspenzije neće biti uračunat u konačnu kaznu, neovisno od toga da li je igrač sam izabrao da se ne takmiči ili ga je suspendovao njegov klub ili asocijacija.
7. Kada se izrekne razdoblje zabrane ekipi, osim ukoliko se iz razloga pravednosti zahtijeva drugačije, razdoblje zabrane počinje na dan konačnog saslušanja na kojem se donosi odluka u vezi zabrane ili, ukoliko se stranka odrekla saslušanja, na datum kada je zabrana prihvaćena ili drugačije izrečena. Svako razdoblje privremene suspenzije ekipe (bilo da je izrečeno ili dobrovoljno prihvaćeno), bit će uračunato u ukupno razdoblje zabrane koje se ima odraditi.

Status tokom zabrane

Član 46.

1. Zabrana učešća tokom trajanja nepodobnosti

Nijedan igrač koji je proglašen nepodobnim za nastupanje ne smije tokom perioda zabrane učestvovati ni u kojem svojstvu u nekom takmičenju ili aktivnosti (osim autorizovanih anti-doping edukacija ili rehabilitacijskih programa) koje je autorizovao ili organizovao NS/FS BiH, klub ili druga organizacija članica asocijacije.

Bez obzira na naprijed navedeno, igrač može prije isteka perioda zabrane početi ponovo trenirati ili se baviti drugim aktivnostima koje nisu vezane za takmičenje koja njegov tim organizuje, pod uslovom da ta zabrana prevazilazi šest mjeseci.

Datum na koji se igrač može ponovo baviti navedenim aktivnostima zavisi od dužine zabrane, kako je propisano u narednoj tabeli:

Period trajanja zabrane	Broj mjeseci prije isteka zabrane tokom kojih se može odvijati trening ili aktivnosti koje nisu u vezi sa takmičenjem
Manje od šest mjeseci	Nula mjeseci
Šest do devet mjeseci	Jedan mjesec
Deset mjeseci do jedne Godine	Dva mjeseca
Godina ili više	Tri mjeseca

2. Dodatna pravila u slučaju perioda trajanja zabrane dužeg od četiri godine

Igrač kojem je izrečen period zabrane duži od četiri godine može, nakon što odsluži četiri godine zabrane, učestvovati u lokalnim sportskim takmičenjima u nekom sportu koji nije isti sport u kojem je povrijedio anti-doping pravilo, ali samo ukoliko to lokalno sportsko takmičenje nije na nivou na kojem bi se igrač ili druga osoba inače mogla kvalifikovati direktno ili indirektno za takmičenje u (ili akumulirati kvalifikacione bodove) državnom prvenstvu ili međunarodnom takmičenju. Igrač kojem je izrečena zabrana i dalje ostaje predmet testiranja.

3. Kršenje zabrane učešća tokom nepodobnosti

Kad igrač koji je proglašen nepodobnim za nastupanje prekrši zabranu da učestvuje tokom nepodobnosti, period trajanja zabrane koji je prvobitno izrečen počće teći iznova od datuma povrede.

Novi period zabrane može biti smanjen u skladu sa Svjetskim anti-doping kodeksom ukoliko igrač dokaže da nije bilo njegove značajne krivice ili nemara za kršenje zabrane učešća. Odluku o tome da li je igrač prekršio zabranu učešća i da li je smanjenje zabrane u skladu sa Svjetskim anti-doping kodeksom bilo odgovarajuće, donosi Agencija za anti-doping kontrolu BiH čije vođenje rezultata analiza je dovelo do izricanja inicijalnog perioda zabrane.

4. Zadržavanje finansijske podrške tokom zabrane

Pored toga, za povredu anti-doping pravila koja ne uključuje smanjenu sankciju za specificirane supstance, neki dio ili kompletnu sportsku finansijsku podršku ili druge sportske beneficije koje prima taj igrač, zadržaće NS/FS BiH, članice NS/FS BiH i njihove članice.

Automatsko objavljivanje kazne

Član 47.

1. Kazna uključuje objavljivanje (javno objavljivanje), kao što je predviđeno ovim Pravilnikom, Svjetskim antidoping kodeksom i Međunarodnim standardima.

Testiranje prije vraćanja prava igranja

Član 48.

2. Kao uslov za vraćanje podobnosti na kraju specificiranog perioda nepodobnosti, igrač je dužan, tokom bilo kojeg perioda privremene suspenzije ili nepodobnosti, biti na raspolaganju za testiranje izvan takmičenja bilo kojoj anti-doping organizaciji koja je nadležna za testiranje, te je dužan dostaviti tačne informacije o svom aktuelnom boravištu.
3. Ukoliko se igrač koji proglašen nepodobnim povuče iz sporta, bude izbrisan iz grupa za testiranje izvan takmičenja, a kasnije zatraži reaktiviranje u sportu, taj igrač neće imati pravo da se vrati u sport dok o tome ne obavijesti NS/FS BiH i Agenciju za antidoping kontrolu BiH i predmetnu asocijaciju i ne prođe testiranje izvan takmičenja za vremenski period koji je jednak periodu nepodobnosti koji je ostao neodslužen na datum kad se povukao iz sporta.

Poništenje rezultata u takmičenjima nakon uzimanja uzorka ili počinjenja prekršaja anti-doping pravila

Član 49.

1. Pored automatskog poništenja rezultata u takmičenju u kojem je dobiven pozitivan uzorak prema ovom Pravilniku, svi drugi takmičarski rezultati igrača ostvareni od datuma kada je uzet pozitivan uzorak (bilo tokom takmičenja ili izvan takmičenja), ili se dogodio drugi prekršaj anti-doping pravila, do početka bilo koje privremene suspenzije ili razdoblja zabrane, bit će, osim ukoliko se iz razloga pravednosti zahtjeva drugačije, poništeni uz sve posljedice koje iz toga rezultiraju, uključujući gubitak bilo kakvih medalja, bodova i nagrada.

Izricanje novčanih kazni

Član 50.

1. U skladu sa Disciplinskim pravilnikom NS/FS BiH, za povrede anti-doping pravila mogu biti izrečene i finansijske kazne. Međutim, nikakva finansijska sankcija ne smije se smatrati osnovom za smanjenje trajanja nepodobnosti ili druge sankcije koja bi inače bila izrečena u skladu sa Pravilnikom o anti-doping u NS/FS BiH.

Vraćanje novčane nagrade ili druge vrste finansijske podrške

Član 51.

1. Kao uslov za povrat podobnosti nakon povrede anti-doping pravila, igrač je dužan da vrati sve novčane nagrade ili drugu finansijsku podršku koju je primio od sportskih organizacija, a od datuma na koji je uzet pozitivni uzorak ili prekršeno drugo anti-doping pravilo, pa do početka privremene suspenzije ili perioda nepodobnosti.
2. Vraćene novčane nagrade biće usmjerene u pokrivanje troškova uzimanja uzorka i vođenje rezultata u tom predmetu.

XII. POSLJEDICE ZA TIMOVE

Ciljano testiranje tima

Član 52.

1. Kada više od jednog člana tima dobije obavještenje o povredi anti-doping pravila u skladu sa poglavljem VIII u vezi sa takmičenjem, takmičarsko tijelo koje donosi odluke provešće odgovarajuće ciljano testiranje tima tokom takmičarskog perioda.
2. Ukoliko se utvrdi da su više od dva člana ekipe počinili prekršaj anti-doping pravila

tokom takmičarskog razdoblja, Disciplinska komisija NS/FS BiH izriče odgovarajuću kaznu klubu kojem pripadaju članovi ekipe, pored drugih posljedica izrečenih pojedinom igraču zbog počinjenog prekršaja anti-doping pravila.

3. Primjenjive su kazne predviđene članom 53. stav 2. ovog Pravilnika.

Kazna za klub

Član 53.

1. Kada se nađe da je više od jednog člana tima prekršilo neko anti-doping pravilo u toku trajanja takmičenja, Disciplinska komisija NS/FS BiH izreći će odgovarajuću sankciju klubu kojem pripadaju ti članovi tima, pored posljedica izrečenih pojedinačnom igraču/ima koji je/su povrijedio/li anti-doping pravilo.
2. Važiće sljedeće sankcije:
 - a) oduzimanje bodova;
 - b) gubljenje utakmice službenim rezultatom;
 - c) isključenje tima iz konačnog poretka u nekom finalnom takmičenju;
 - d) novčana kazna.

XIII. ŽALBE

Odluke na koje se ulaže žalba

Član 54.

1. Na sve odluke u vezi povreda anti-doping pravila i u vezi posljedica proizašlih iz Pravilnika o anti-doping NS/FS BiH moguće je uložiti žalbu kako je propisano donjim članovima 55. do 57., kao i Disciplinskim pravilnikom NS/FS BiH. Na sve odluke kojima je odobreno ili odbijeno izdavanje TUE-a moguće je uložiti žalbu kao što je propisano Svjetskim anti-doping kodeksom.
2. Donesene odluke ostaju na snazi dok traje žalbeni postupak, osim kad žalbeno tijelo odluči drugačije.
3. Nakon što se iscrpe svi interni kanali, moguće se obratiti Sportskom arbitražnom sudu.

Interni pravni lijekovi

Član 55.

1. Na odluke Disciplinske komisije NS/FS BiH može se uložiti žalba Apelacionoj komisiji NS/FS BiH u skladu sa Disciplinskim pravilnikom NS/FS BiH.

Žalbe na odluke donesene na državnom nivou

Član 56.

1. U slučajevima koji proisteknu iz državnog takmičenja ili slučajevima u koje su involvirani igrači državnog ranga, a za koje ne postoji pravo na žalbu, žalba na odluku može se podnijeti nezavisnom i nepristrasnom tijelu CAS u Lozani, sve do uspostave Arbitražnog suda NS/FS BiH u skladu sa odredbama Statuta NS/FS BiH.
2. Pravila za takvu žalbu moraju poštovati sljedeće principe:
 - a) pravovremeno saslušanje, ako je traženo;
 - b) pravedan, nepristrasan i nezavisni pretresni panel;
 - c) pravo na zastupanje od strane advokata na trošak samog igrača;
 - d) pravovremena, pisana i obrazložena odluka.

Žalbe na odluke donesene na međunarodnom nivou

Član 57.

1. U slučajevima koji proizilaze iz učešća u međunarodnom takmičenju ili u slučajevima u koje su uključeni igrači međunarodnog ranga, primjenjuju se odredbe FIFA Pravilnika o anti-dopingu.

XIV. POVJERLJIVOST I IZVJEŠTAVANJE

Informacije o potencijalnim povredama anti-doping pravila

Član 58.

1. Igrač ili drugo lice biće obavještavani kako je predviđeno Disciplinskim pravilnikom NS/FS BiH.

2. Anti-doping organizacija odgovorna za vođenje rezultata dužna je obavijestiti igračev klub, najkasnije do početka postupka opisanog u članu 26. ovog Pravilnika.
3. Obavještenje mora sadržavati ime igrača, klub, nivo na kojem se igrač takmiči, da li je test rađen tokom takmičenja ili izvan takmičenja, datum uzimanja uzorka, te rezultat analiza koji je dostavila laboratorija.
4. Ista lica ili anti-doping organizacije će biti redovno obavještavani o statusu i nalazima eventualnih revizija ili postupaka provedenih u skladu sa poglavljima VIII, IX, X ili XIII i promptno će im biti dostavljana pisana obrazložena pojašnjenja ili odluke kojima se objašnjava zašto je neko pitanje riješeno kao u dispozitivu.
5. U skladu sa članom 29. ovog Pravilnika, NS/FS BiH će biti obavještavana o odlukama pretresnog panela kako je predviđeno u poglavljima X i XIII.
6. Primaoci odluka ne smiju otkrivati informacije nikome izvan kruga osoba koje treba da znaju te informacije (što bi uključivalo odgovarajuće osoblje relevantnog Nacionalnog olimpijskog komiteta, asocijacije i kluba) sve dok NS/FS BiH, u skladu s njihovom odgovornošću za vođenje rezultata, ne obznane te informacije ili ih zadrže povjerljivim kako je propisano članom 62. ovog Pravilnika.
7. Anti-doping organizacija koja proglasi, ili primi obavještenje o nepoštivanju obaveza igrača u vezi dostavljanja adrese boravišta ne smije tu informaciju otkrivati osobama izvan kruga osoba koje treba to da znaju izuzev ako se zaključi da je igrač povrijedio anti-doping pravilo iz člana 8. na osnovu nepoštivanja obaveze igrača u vezi dostavljanja adrese boravišta. Osobe koje trebaju znati tu informaciju takođe su dužne da je drže u povjerenju do istog vremenskog trenutka.

Javno otkrivanje

Član 59.

1. Nijedna anti-doping organizacija niti laboratorija koju je akreditovala WADA, ili dužnosnik neke od njih, ne smije javno komentarisati specifične činjenice nekog slučaja čije je rješavanje u toku (suprotno opštem opisu postupka i nauke) izuzev kao odgovor na javne komentare koji se pripisuju igraču, drugom licu ili njihovim predstavnicima.
2. Tek nakon što je na pretresu u skladu sa poglavljem X utvrđeno da je prekršeno anti-doping pravilo, ili nakon što se neka strana odrekla prava na taj pretres, ili nakon što tvrdnja o počinjenoj povredi anti-doping pravila nije pravovremeno osporena, NS/FS BiH i Agencija za antidoping kontrolu BiH, može javno otkriti takvu odluku o anti-doping slučaju, uključujući nalaz da je prekršeno anti-doping pravilo, ime igrača, involviranu zabranjenu supstancu ili zabranjeni metod, te posljedice izrečene u skladu sa njihovom politikom informisanja. NS/FS BiH i Agencija za antidoping kontrolu BiH takođe može javno otkriti odluke po žalbama u vezi povreda anti-doping pravila.
3. U slučaju kad se, nakon žalbe, utvrdi da igrač ili drugo lice nije napravilo povredu anti-doping pravila, odluka se može javno objaviti samo uz odobrenje igrača ili drugog lica

koje je predmet takve odluke. NS/FS BiH ili dužan je javno objaviti odluku u cjelosti ili u nekoj revidiranoj formi koju može odobriti igrač ili drugo lice.

4. Za potrebe ovog člana, obaveza objavljivanja će se ispuniti najmanje postavljanjem tražene informacije na web-sajt NS/FS BiH i Agencije za antidoping kontrolu BiH.

Informacije o boravištu i testiranju

Član 60.

1. Informacije o aktuelnom boravištu igrača koje je NS/FS BiH identifikovao za svoju IRTP listu biće dostavljene Agenciji za anti-doping kontrolu BiH. Te informacije će se cijelo vrijeme čuvati u strogoj tajnosti, koristiće se isključivo u svrhe planiranja, koordiniranja ili provođenja testiranja i biće uništene nakon što više ne budu služile u te svrhe.
2. NS/FS BiH može svoje članice i njihove članice izvještavati o svim testovima u toku i izvan takmičenja urađenim na igračima s njene IRTP liste. Te informacije će biti dostupne igraču i igračevom klubu.

Privatnost podataka

Član 61.

1. Rukovanje ličnim informacijama koje se odnose na igrače ili treća lica koje se prikupljaju, čuvaju, obrađuju ili objavljuju prilikom vršenja obaveza propisanih Pravilnikom o anti-doping u NS/FS BiH mora ispunjavati važeću zaštitu podataka i zakona o čuvanju privatnosti, kao i međunarodni Standard za zaštitu i privatnost ličnih podataka.

XV. ZASTARA

Zastara

Član 62.

1. Protiv igrača ili drugog lica ne može biti pokrenut nikakav postupak zbog povreda anti-doping pravila predviđenih ovim Pravilnikom o anti-doping u ukoliko isti nije započet u roku od osam godina od datuma za koji je utvrđeno da je počinjena povreda.

XVI. PRIZNAVANJE

Uzajamno priznavanje

Član 63.

1. NS/FS BiH će priznati i poštivati postupke/procedure koji su predmet prava na žalbu u skladu sa poglavljem XIII, testiranjem, TUE-ima i rezultatima pretresa ili drugim konačnim presudama neke potpisinice Svjetskog anti-doping kodeksa koji su u skladu sa Svjetskim anti-doping kodeksom a nalaze se u nadležnosti takve potpisinice.
2. NS/FS BiH će priznati iste postupke drugih tijela koja nisu prihvatila Svjetski anti-doping kodeks ukoliko su pravila takvih tijela inače u skladu sa Svjetskim anti-doping kodeksom.

Priznavanje od strane klubova i članica NS/FS BiH

Član 64.

1. Ukoliko je doping kontrole vršila Agencija za antidoping kontrolu BiH ili druga ovlaštena antidoping organizacija, svaki klub ili članica NS/FS BiH dužna je priznati rezultate takvih doping kontrola.
2. Ukoliko je doping kontrole vršila vršila Agencija za antidoping kontrolu BiH ili druga ovlaštena antidoping organizacija svaki klub i članica dužna je priznati takve odluke i preduzeće sve što je potrebno da bi iste imale dejstvo.

XVII. OPŠTA PRAVILA

Adresati

Član 65.

1. Odluke i drugi dokumenti namijenjeni igračima, klubovima, službenim licima utakmice i dužnosnicima adresiraju se na klubove ili predmetnu članicu NS/FS BiH pod uslovom da isti, bez odlaganja, te dokumente prosljedi predmetnim stranama. U slučaju da dokumenti nisu takođe ili isključivo poslani i predmetnoj strani, smatraće se da su ti dokumenti pravilno dostavljeni krajnjem adresatu četiri dana nakon dostavljanja dokumenata članici.

Forma

Član 66.

1. Odluke koje su poslone faxom smatraće se zakonski obavezujućim. Alternativno, odluke se mogu slati i preporučenom poštom, što će se takođe smatrati zakonski obavezujućim.
2. Dostavljanje odluka elektronskom poštom (e-mail) nije dozvoljeno.

3. U izuzetnim okolnostima, strane mogu biti informisane samo o osnovnom dijelu odluke. Obrazložena odluka mora biti dostavljena u roku od 30 dana. Zakonski rok ne počinje teći sve dok ne bude dostavljena obrazložena odluka.

Tumačenje Pravilnika o anti-dopingu

Član 67.

1. Dodaci ovog Pravilnika se imaju smatrati sastavnim dijelom ovog pravilnika.
2. Razni naslovi i podnaslovi u ovom pravilniku služe samo u svrhu preglednosti istog i neće se smatrati dijelom sadržaja Pravilnika o antidopingu niti će ni na koji način uticati na jezik odredaba na koje se poziva.

Dodatni propisi

Član 68.

Pored ovog, primjenjivaće se i Disciplinski pravilnik NS/FS BiH i svi ostali važeći propisi NS/FS BiH.

Predmet primjene: vrijeme

Član 69.

1. Ovaj Pravilnik se primjenjuje na činjenice koje se jave nakon stupanja na snagu istog. Ovaj Pravilnik se takođe primjenjuje na ranije nastale činjenice ukoliko je ovaj Pravilnik jednako povoljan ili povoljniji za počinioca tih činjenica i ako pravna tijela NS/FS BiH o tim činjenicama odlučuju nakon što ovaj Pravilnik stupi na snagu. Za razliku od toga, pravila koja regulišu proceduru primjenjuju se odmah nakon što ovaj Pravilnik stupi na snagu.

Pitanja koja nisu predviđena Pravilnikom

Član 70.

1. Pitanja koja nisu predviđena ovim Pravilnikom rješavaće Izvršni odbor NS/FS BiH na prijedlog Komiteta za sportsku medicinu NS/FS BiH.
2. Pravilnik o anti-dopingu NS/FS BiH će se implementirati i tumačiti u skladu sa Disciplinskim pravilnikom, Svjetskim antidoping kodeksom, Međunarodnim standardima i Statutom NS/FS BiH.
3. Na sva pitanja koja nisu uređena ovim pravilnikom, kao i na ona pitanja koja su eventualno u suprotnosti sa Svjetskim antidoping kodeksom, prioritetno će se primjenjivati Svjetski antidoping kodeks.

4. Eventualni sporovi proistekli iz ili vezani za ovaj Pravilnik rješavaće se u skladu sa jurisdikcijom NS/FS BiH, ovim Pravilnikom, Disciplinskim pravilnikom, Svjetskim antidoping kodeksom i Statutom NS/FS BiH.

Stupanje na snagu

Član 71.

1. Izvršni odbor NS/FS BiH je usvojio ovaj Pravilnik 01.07.2017.godine, a stupa na snagu osmog dana od dana objavljivanja u Službenom glasniku NS/FS BiH „Nogomet/Fudbal BiH“.
2. Stupanjem na snagu ovog Pravilnika prestaje važenje Pravilnika o anti-dopingu NS/FS BiH od 08.05.2012. godine.

Predsjednik

Elvedin BEGIĆ

DODACI

DODATAK A

Definicije

Nepovoljan nalaz analize: izvještaj laboratorije ili subjekta kojeg je ovlastila WADA, koji u skladu s Međunarodnim standardom za laboratorije i relevantnim tehničkim dokumentima, u uzorku identifikuje prisustvo neke zabranjene supstance ili njenog metabolita ili markera (uključujući povišene količine endogenih supstanci) ili dokaz o upotrebi zabranjenog metoda.

Anti-doping organizacija: potpisnica koja je odgovorna za usvajanje pravila za iniciranje, implementiranje ili provođenje bilo kojeg dijela postupka doping kontrole. Primjeri za anti-doping organizaciju uključuju Međunarodni olimpijski komitet, Međunarodni paralimpijski komitet, ostale organizatore velikih događaja koji provode testiranje na tim događajima, WADA-u, međunarodne federacije i nacionalne anti-doping organizacije.

Pokušaj: namjerno obavljanje aktivnosti koja predstavlja ozbiljan korak ka ponašanju koje će kulminirati u povredu anti-doping pravila. Međutim, neće se smatrati da je počinjena povreda anti-doping pravila isključivo na osnovu pokušaja da se počinini povreda kad lice odustane od pokušaja prije nego što ga otkrije treća strana koja ne učestvuje u pokušaju.

Atipični nalaz: izvještaj laboratorije ili drugog subjekta kojeg je ovlastila WADA koji zahtijeva dalju istragu kako propisuju Međunarodni standard za laboratorije i relevantni tehnički dokumenti prije nego se definiše nepovoljan nalaz analize.

CAS: Sud za sportsku arbitražu, Lozana, Švicarska

Lanac čuvanja: niz osoba ili organizacija koje su odgovorne za uzorak od trenutka uzimanja uzorka do prijema istog na analizu.

Pratilac: službeno lice koje je obučeno i ovlašćeno da vrši određene dužnosti, uključujući nešto ili sve od ovog što slijedi: da prati i opservira igrača izabranog za davanje uzorka do dolaska u prostoriju za doping-kontrolu; i/ili da svjedoči i da potvrdi da je dat uzorak, kada ga završena obuka kvalifikuje za taj zadatak.

Takmičenje: serija fudbalskih utakmica koje vodi jedinstveno upravljačko tijelo (npr. Takmičenja u Premijer ligi, Prvim ligama, turniri i slično. U FIFAinoj službenoj terminologiji termin „Takmičenje” odgovara terminu „Događaj” iz Svjetskog anti-doping kodeksa.

Takmičarski period: vrijeme između početka i kraja nekog takmičenja, kako utvrde pravna tijela određenog takmičenja.

Diskvalifikacija: rezultati tima na određenom takmičenju se poništavaju, sa svim posljedicama toga, uključujući oduzimanje eventualnih medalja, bodova i nagrada.

Doping kontrola: svi koraci i postupci od planiranja rasporeda testiranja do konačne odluke o eventualnim žalbama, uključujući sve korake i postupke između toga, kao što je dostavljanje informacija o boravištu, uzimanje uzoraka i rukovanje istima, laboratorijska analiza, izuzeća za terapijsku upotrebu, vođenje rezultata i pretresi.

Službenik za kontrolu dopinga: osoba koja vrši uzimanje uzoraka.

Komiteet za sportsku medicinu: stalni komitet NS/FS BiH, propisan Statutom NS/FS BiH, koji se bavi svim medicinskim aspektima fudbala, uključujući pitanja vezana za doping.

Propisi: Statut, pravilnici, direktive i cirkularna pisma NS/FS BiH kao i Pravila koja izdaje Odbor / Bord Međunarodne fudbalske asocijacije.

Doping kontrola u toku takmičenja: doping kontrola koja se provodi na državnim i međunarodnim fudbalskim utakmicama ili takmičenjima (U FIFAinoj službenoj terminologiji termin „Takmičenje” odgovara terminu „Događaj” iz Svjetskog anti-doping kodeksa). „U toku takmičenja” počinje 24 sata prije početka pojedinačne utakmice ili prve utakmice nekog takmičenja i završava 24 sata nakon okončanja uzimanja uzoraka koje se odvija nakon zadnjeg zvižduka na pojedinačnoj utakmici ili finalnoj utakmici takvog takmičenja.

Nepodobnost: suspenzija igrača ili osobe na određeni vremenski period iz učešća u nekom

takmičenju ili drugoj aktivnosti ili od primanja sportske financijske podrške iz poglavlja XI.

Međunarodno takmičenje: takmičenje u kojem je Međunarodni olimpijski komitet, Međunarodni paralimpijski komitet, međunarodna federacija, organizacija za velike događaje, ili druga međunarodna sportska organizacija rukovodeće tijelo tog takmičenja ili koji imenuje tehnička službena lica za takmičenje (U FIFAinoj službenoj terminologiji termin „Međunarodno takmičenje” odgovara terminu „Međunarodni događaj” iz Svjetskog anti-doping kodeksa).

Igrač u međunarodnom rangu: igrač kojeg je FIFA ili konfederacija odredila za registrovanu test grupu FIFAe ili konfederacije.

Međunarodni standard: standard (npr. Međunarodni standard testiranja) koji je usvojila WADA kao podršku Svjetskom anti-doping kodeksu. Za poštivanje nekog Međunarodnog standarda (za razliku od nekog drugog alternativnog standarda, prakse ili procedure) biće dovoljno da se zaključi kako su procedure kojima se bavi Međunarodni standard pravilno provedene. Međunarodni standardi će obuhvatati i eventualne tehničke dokumente izdate u skladu sa tim međunarodnim standardom.

Marker: jedinjenje, grupa jedinjenja ili biološki parametar(ri) koji indicira(ju) upotrebu zabranjene supstance ili zabranjenog metoda.

Utakmica: jedna (pojedinačna) fudbalska utakmica. „Takmičenje” u anti-doping kodeksu odgovara terminu „Utakmica” u službenoj terminologiji NS/FS BiH.

Službena lica utakmice: sudija, pomoćne sudije, četvrti sudija, komesar utakmice, inspektor suđenja, osoba zadužena za bezbjednost, te bilo koja druga osoba koju NS/FS BiH imenuje za neku odgovornost vezano za utakmicu.

Metabolit: bilo koja supstanca proizvedena u procesu biotransformacije.

Maloljetnik: fizičko lice koje nije dostiglo starost da bi se smatralo punoljetnim kako predviđaju važeći zakoni zemlje u kojoj to lice živi.

Nacionalna anti-doping organizacija (NADO): subjekat(ti) koje odredi svaka zemlja kao subjekat(e) koji ima(ju) primarnu nadležnost i odgovornost za usvajanje i implementaciju anti-doping pravila, izdavanje naloga za uzimanje uzoraka, vođenje rezultata analiza, te vođenje pretresa, i sve to na državnom nivou. To obuhvata i subjekat koji više zemalja mogu zadužiti da služi kao regionalna anti-doping organizacija za te zemlje. Ukoliko takvo zaduženje nije došlo od nadležne javne vlasti, taj subjekat će biti nacionalni olimpijski komitet te zemlje ili subjekat koji ovaj odredi, kao što je asocijacija.

Državno takmičenje: sportsko takmičenje u kojem mogu učestvovati igrači u državnom ili međunarodnom rangu ali koje nije međunarodno takmičenje.

Igrač u državnom rangu: igrač kojeg je državna organizacija odredila za člana svoje registrovane test grupe.

Nacionalni olimpijski komitet: organizacija koju je priznao Međunarodni olimpijski komitet. Termin komitet takođe obuhvata Državni sportski savez u onim zemljama u kojima Državni sportski savez preuzima uobičajene odgovornosti Nacionalnog olimpijskog komiteta u oblasti anti-dopinga.

Doping kontrola bez prethodnog obavještenja: doping kontrola koja se provodi bez prethodnog obavještenja igraču i gdje je igrač pod stalnom pratnjom od trenutka obavještanja pa sve do uzimanja uzorka.

Bez krivice ili nemara: kad igrač tvrdi da nije znao niti posumnjao, i da rezonski nije mogao znati ili posumnjati, čak i uz izuzetni oprez, da je koristio ili da mu je data zabranjena supstanca ili zabranjeni metod.

Bez značajne krivice ili nemara: kad igrač tvrdi da njegova krivica ili nemar, sagledani u ukupnim okolnostima i uzimajući u obzir kriterije za tvrdnju bez krivice ili nemara, nije značajna u odnosu na povredu anti-doping pravila.

Dužnosnici: svi, uz izuzetak igrača, koji se bave aktivnošću vezanom za fudbal u asocijaciji ili klubu, neovisno od funkcije, vrste aktivnosti (administrativna, sportska ili druga) i trajanja te aktivnosti, naročito se smatraju dužnosnicima mendažeri, treneri, te pomoćno sportsko osoblje.

Doping kontrola izvan takmičenja: svaka doping kontrola koja se ne odvija tokom nekog takmičenja.

Učesnik: Bilo koji igrač ili član pomoćnog sportskog osoblja.

Igrač: svaka osoba koja učestvuje u fudbalu na međunarodnom nivou (kako je definisala FIFA, uključujući ali ne ograničavajući se na lica u njenoj registrovanoj test grupi), državnom nivou (kako je definisao svaki NADO, uključujući ali ne ograničavajući se na lica u njegovoj registrovanoj test grupi), te bilo koji drugi takmičar u sportu koji bi inače bio predmet jurisdikcije bilo koje potpisnice ili druge sportske organizacije koja prihvata Svjetski anti-doping kodeks. Za potrebe informisanja i edukacije o anti-dopingu, svaka osoba koja učestvuje u sportu pod nadležnošću bilo koje potpisnice, vlade ili druge sportske organizacije koja prihvata Svjetski anti-doping kodeks je igrač.

Pomoćno sportsko osoblje/Osoblje za podršku igraču: svaki trener, kondicioni trener, menadžer, agent, član osoblja tima, dužnosnik, član medicinskog osoblja, paramedicinskog osoblja, roditelj ili bilo koja druga osoba koja radi s igračem, ili ga tretira ili pomaže igraču koji učestvuje u takmičenju ili se priprema za isto.

Posjedovanje: stvarno fizičko posjedovanje, ili konstruktivno posjedovanje (koje se nalazi samo ukoliko osoba ima isključivu kontrolu nad zabranjenom supstancom ili zabranjenim metodom ili prostorijama u kojima postoji zabranjena supstanca ili zabranjeni metod); pod uslovom, međutim, da ukoliko osoba nema isključivu kontrolu nad zabranjenom supstancom ili zabranjenim metodom ili prostorijama u kojima postoji zabranjena supstanca ili zabranjeni metod, da će se utvrditi konstruktivno posjedovanje samo ako je ta osoba znala za prisustvo zabranjene supstance ili zabranjenog metoda i namjeravala je da ih uzme pod kontrolu. Međutim, pod uslovom da neće biti povreda anti-doping pravila samo na osnovu posjedovanja, ukoliko prije primljenog obavještenja bilo koje vrste da je osoba počinila povredu anti-doping pravila, je ta osoba preduzela konkretnu akciju kojom je pokazala da nikad nije imala namjeru da dođe u posjed i da je odbila da dođe u posjed eksplicitno to izjavljujući anti-doping organizaciji. Bez obzira na bilo šta što je u suprotnosti s ovom definicijom, kupovina (uključujući elektronska ili druga sredstva) zabranjene supstance ili zabranjenog metoda predstavlja posjedovanje od strane osobe koja vrši kupovinu.

Preliminarni pretres: ubrzani skraćeni pretres prije pretresa u skladu sa odredbama Poglavlja X, na osnovu kojeg se igraču šalje obavještenje i pruža prilika da bude saslušan bilo usmeno ili pismeno.

Zabranjena lista: lista koju objavljuje WADA u kojoj su identifikovane zabranjene supstance i zabranjeni metodi.

Zabranjeni metod: svaki metod koji je opisan kao takav u Zabranjenoj listi.

Zabranjena supstanca: svaka supstanca koja je opisana kao takva u Zabranjenoj listi.

Privremena suspenzija: igraču ili drugoj osobi je privremeno zabranjeno da učestvuje u bilo kojem takmičenju prije konačne odluke na pretresu koji se vodi u skladu sa poglavljem X.

Otkriti ili obznaniti u javnosti: davati ili distribuirati informacije široj javnosti ili osobama izvan kruga osoba koje imaju pravo da budu ranije obaviještene u skladu sa poglavljem XIV.

Registrovana test grupa: grupa vrhunskih igrača koju je posebno utvrdio NS/FS BiH ili njena članica koja je predmet testiranja u toku i izvan takmičenja kao dio plana rasporeda testiranja NS/FS BiH, članice ili Agencije za anti-doping kontrolu.

Uzorak ili primjerak: svaki biološki materijal uzet za potrebe doping kontrole.

Potpisnice: oni subjekti koji su potpisali WADAin Kodeks i koje su prihvatile da se pridržavaju WADAinog Kodeksa, uključujući Međunarodni olimpijski komitet, međunarodne saveze, Međunarodni paralimpijski komitet, Nacionalne olimpijske komitete, organizacije velikih događaja, NADOe i WADAu.

Značajna pomoć: za potrebe poglavlja V, osoba koja pruža značajnu pomoć mora: (1) u cjelosti objelodaniti, u potpisanoj izjavi, sve informacije koje posjeduje u vezi povreda anti-doping pravila i (2) u potpunosti sarađivati u istrazi i odlučivanju o nekom predmetu koji se odnosi na te informacije, uključujući, na primjer, svjedočenje na pretresu ukoliko od iste to zatraži neka anti-doping organizacija ili pretresni panel. Nadalje, pružene informacije moraju biti kredibilne i sadržavati bitan dio bilo kojeg predmeta koji je pokrenut ili, ukoliko nije pokrenut, mora pružati dovoljno osnove na kojoj bi se zasnivao predmet.

Ometanje: neprimjereno ponašanje ili neprimjeren način; neprimjeren uticaj na postupak;

neodgovarajuće mješanje, opstrukcija; obmanjivanje ili učestvovanje u nekom prevarantskom ponašanju u cilju zamjene rezultata ili sprečavanja redovnog toka kontrole; ili pružanje lažnih informacija anti-doping organizaciji.

Ciljano testiranje: biranje igrača za testiranje gdje su određeni igrači ili grupa igrača nenasumično izabrani za testiranje u određeno vrijeme.

Timska aktivnost: sve sportske aktivnosti (npr. treniranje, putovanje, taktičke sesije) na kolektivnoj osnovi s igračevim timom ili druge aktivnosti pod supervizijom tima (npr. tretman od strane timskog ljekara).

Testiranje: dijelovi procesa doping-kontrole koji involviraju planiranje rasporeda testiranja, uzimanje uzorka, rukovanje uzorkom, te transport uzorka u laboratoriju.

Promet: prodaja, davanje, transportovanje, slanje, isporuka ili distribucija zabranjene supstance ili zabranjenog metoda (bilo fizički ili nekim elektronskim ili drugim sredstvom) od strane igrača, člana pomoćnog sportskog osoblja ili bilo kojeg drugog lica koje je predmet nadležnosti anti-doping organizacije, bilo kojoj trećoj strani, međutim, pod uslovom da ova definicija ne obuhvata akcije medicinskog osoblja u dobroj vjeri (bona fide) koje involviraju zabranjenu supstancu koja se koristi za istinske i zakonite terapijske svrhe ili drugo prihvatljivo opravdanje, i neće obuhvatati akcije koje involviraju zabranjene supstance koje nisu zabranjene na testiranju izvan takmičenja izuzev ako okolnosti u cjelini demonstriraju da namjena tih zabranjenih supstanci nije bila u istinsku i zakonitu terapijsku svrhu.

Upotreba: korištenje, primjena, unos, ubrizgavanje ili konzumiranje na bilo koji mogući način bilo koje zabranjene supstance ili zabranjenog metoda.

WADA: Svjetska anti-doping organizacija.

DODATAK B.

ZABRANJENA LISTA (LISTA ZABRANJENIH SUPSTANCI I METODA)

Pogledati Zabranjenu listu koju je objavila WADA, koja se može naći na www.wada.ama.org.

DODATAK C.

IZUZEĆA ZA TERAPIJSKU UPOTREBU

Igraču može biti odobreno izuzeće za terapijsku upotrebu kojim mu se dozvoljava upotreba zabranjene supstance ili zabranjenog metoda koja/i se nalazi na Zabranjenoj listi. Zahtjev za TUE se podnosi na odgovarajućem obrascu Odboru za terapijska izuzeća ADA BiH.

Odbor za terapijska izuzeća provodi postupak obrade zahtjeva za TUE u skladu sa Međunarodnim standardima i Pravilnikom za odobravanje zahtjeva za TUE.